

永平府志卷六十八

列傳二十 列女上

元

王宗仁妻宋氏進士宋褫之女也兵亂宗仁攜氏及女避於鐔子山爲軍所擄行抵玉田窺氏色美欲害宗仁氏泣謂夫曰不幸至此必不以身累君遂偕女投井死時年二十九

明

張氏東勝左衛知州唐福繼室也年二十四而福亡遺腹子騶例宜襲職族人爭之氏籲天曰得存此息以

永平府志

卷六十八

列女上

一

奉烝嘗足矣讓之後教騶成明經任學正騶二子宓任州判守任推官宓二子承光任知縣承先任教諭元孫青衿濟濟人咸謂天之報其讓德焉

羅氏順天大興縣世家女青州守朱鑑之族孫昌期贅居焉昌期亡遺孤明時幼氏依母家守節課子占籍大興登萬曆庚戌進士歷任河南兵備道副使

劉氏世胄女性貞靜曉書史御史韓應庚五十無子求爲笱室父難之女展絡秀傳故使父見父解其意乃遣之年二十八而應庚卒生子原濬方十餘歲劉扶嫡郝氏坐堂上呼家僮抱原濬於前慨然諭以撫孤

大義內外帖然庚午之變郡城垂危劉盡生平所貯括萬金上軍門犒師命原濬出避以存韓祀而身自守家城陷復以智免

華陰令韓應奎仲子原潔妻樂亭王大司徒孫友也崇正庚午夫遇害民尋夫尸於積骸狼藉中得之大哭卽欲枕尸而死姑徐氏攜孤坤業泣勸百端乃忍慟返逾兩月生子泰業苦節守志教子游泮論者以爲不愧兩家門閥云

李氏布政司充濁之女適盧龍衛指揮焦承勳勳卒氏年方二十餘誓欲殉夫哀毀絕粒姑諭以遺孕在腹當念焦氏後氏乃勉從姑命生子效良撫孤奉姑終身非至親不面詔旌之

韓氏光祿監事李浣妻封御史廷義女也夫卒無嗣哀毀廬墓復肖夫像與翁方伯公祖翁郡守公之像築萬柳莊別業祀之自製詩文書於壁給事白瑜勒石記之

陳氏太僕卿王庭長女也適庠生韓景昌次女名靜英字灤州高尚書之孫士鳳崇正庚午景昌死於兵氏扶八旬祖姑抱三歲孤遇春皆得免時靜英已長成美慧獨絕鄉紳白某妻羅氏欲爲姪娶之乃給太僕

夫人云今朝廷將選民間秀女盍使靜英避余家至則羅譌言高已闔門被殺強之議婚靜英大哭夜題三詩於壁簪高氏聘釵以領巾結吭死詔建坊旌之而陳氏撫孤子遇春後亦成立爲諸生

兩當縣令李可培妻秦氏崇正庚午被擄不屈投井死子生員正藻被殺婦田氏年十九時產子端纔六日亦投井從姑救出竟無恙後養祖姑至九十歲撫端爲庠生

東勝衛程玉妻王氏夫亡里媪欲奪其志以厚利啗姑姑許之氏聞而泣曰妾卽棄人子亦知羞恥而顧以

永平府志

卷六十八

列女上

三

利失身乎且辱父母矣遂投繯死總兵羅希韓葬之城西蘆岡總理戚公繼光爲之立碑

廖承訓妻陳氏舉人廖從周之子婦也從周有弟曰師周與承訓皆死崇正庚午之亂陳氏生一女師周有兒曰雅尙未週齡妻劉氏病無湏兒苦饑呱呱泣於牀陳恐廖氏之無後也乃舍己女以乳之稍長教督亦無異所生雅讀書爲諸生終身事之如母焉

僉憲韓原善繼妻封孺人賦性貞靜年三十而寡力持家政待前室子廣業最慈佐膏火使成名士次宏業已出也甫數歲僉憲卒教之獨嚴後官知縣

翟堂妻錢氏燕河營人堂卒氏方十九子守忠尚在襁
褓奉姑守節姑八十餘終子亦尋卒門無五尺童家
無升斗糈與子婦相依爲命以女紅餬口人稱雙節
陸純妻彭氏夫故守節撫子松成立年至八十五松死
庚午之難妻梁氏撫孤完節年至七十五

楊江妻李氏夫亡無子嘉靖九年敵自黃崖入犯被獲
擁之上馬不從大罵見殺
楊大芳妻謝氏夫亡絕粒九日而死與夫同棺而殯

國朝

童人文妻高氏年十八而寡誓以身殉家人防之嚴乃

永平府志

卷六十八

列女上

四

潛擲身水甕中家人聞聲趨救嘔水斗餘而蘇翁姑
對之泣曰爾又死吾老人何以生爾不可相待乎諾
焉及翁姑終曰吾有死日矣晝夜號泣嘔血而亡時
年二十五距夫沒方七載也

康賡颺妻胡氏生子二長三歲次未週年而賡颺亡百
日內二子又相繼殤氏年方十九晝夜哭幾不欲生
時其夫兄賡虞有一子不禁慨然曰吾子雖單甯絕
嗣請後吾弟氏收涕曰子則無節不可無夫不在姑
固也在也吾守吾節奉吾姑而已吾志已定安用子爲
謂余不信因引鍼自刺曰有如此目姑趨救左目已

傷血涔涔滴顛上滿而絕無痛苦容賡虞歎而起曰
弟有婦矣

陽山之溝有烈婦焉既嫁而寡父欲其歸爲之擇配親
往迎之婦不可強之遽起操刀斷髮擲之地父愕然
曰嘻何爲者則又削其鼻曰父之趣我者愛女之心
我之不從者守身之義且父以我年少貌好耳今已
殘矣將焉如辭氣悲壯絕無痛楚意而血已殷襟袖
父頓足曰吾苦汝吾苦汝哭而去烈婦名貞媿氏莫
詳夫白姓奇其名

范氏土山韓義妻也嘉慶十六年白蓮教肆擾土賊借

永平府志

卷六十八

列女上

五

勢搶奪義有膽力習手搏乃糾合村人出捍賊被戕
死氏每哭夫趣走山谷中發聲長號則四山皆應如
有助之哭者哭已拭淚展顏乃歸蓋不欲使姑知以
安姑心也安貧無以存活一日至澗邊浣衣見蒲草
叢生淨綠可愛因取以編扇售之以養姑姑死廬墓
三年至八十餘卒蒲草後不復生

郭孝婦燕河營豈德時之女幼字重峪口郭自立童養
夫家年甫十一夫長婦十歲未合昏卽外出不返音
問杳然孀姑王氏憫婦青年陰勸改適婦泣曰我旣
以身許郭氏矣而去之天平將焉之且兒幼小蒙姑

愛鄰姑與兒俱薄命今姑老矣兒去姑何以生兒誓以十指奉姑終身姑勿兒疑乃大哭姑亦哭曰兒如是則哽咽不成聲而婦之服勞茹苦乃與日俱長矣姑壽八十一病沒婦時年三十八益鍵戶紡織足不踰閩邑之士大夫重其孝共醵百金爲婦餬口計前縣令單公聞其事亦捐俸三十金爲助今婦年六十七矣知府游公至卽以孝婦事實請諸大府得聞於朝復歲給銀帛親往拜於其家遠近豔稱之

閩家莊有女曰趙氏景玉其父王修其夫也十七歲歸修伉儷甚篤一年而修死而勸之改適者不應有勸

永平府志

卷六十八

列女上

六

之守節者亦不應旣葬伺家人睡熟遂自縊鄉人皆曰可謂烈矣嘉慶二十三年長洲陶鳧香來守是郡求所以化民成俗者鄉人因公舉其事陶曰吁可以旌矣乃以貞烈垂型四字顏其門

蘇氏徐氏南邛莊孫姓婦娣姒也家貧偕作相愛如姊妹焉里有惡少年素窺其美屢以賄誘其姑姑惑焉許之而兩婦不從則鞭箠之終不可然折磨使端絕無生理恆相對飲泣一日易新衣袴互爲縫紵又以長繩各繫其臂攜手赴灤河死時道光丙午七月事也一爲施人蘇勤肯之女年二十一爲八棱塔莊徐

起之女年十七

王氏婦柳新莊人也夫早沒夫弟賈於外獨與弟妻居撫諸稚弱家纂貧婦工繪事研朱吮粉畫婦女諸服物託里嫗售之得錢以佐日用門常閉人罕覩其面戚族有賙之者出於婦人則受男子則否久之夫弟沒婦涕泣語弟妻曰吾家生路日窘繪畫利既微而我目漸昏恐不能畫增一坐食人其何以支我死姊就所餘者撫諸孤尙足自給無徒兩累爲也弟妻亦泣曰何至是已而婦取畫餘藤黃咽之遂卒

任子菱妻宋氏城北街人任納貲選湖北縣丞攜氏之里備歷艱險卒扶柩還葬

周阿京妻王氏年二十三始嫁三月而夫亡遺腹生子起麟又天時翁年已耄爲之納妾生子氏恩勤撫育以嫂代母及其子又生子遂繼其一以爲嗣云

傅氏張鱗妻夫篤疾歷歲氏湯藥扶持無倦色至二十六歲夫亡無子女號痛欲殉姑責以大義始抑哀起兩繼夫姪俱夭乃泣請於翁曰是未亡人福薄殃及嗣子也叔再生兒且勿謂未亡人母俟與夫同穴時始正繼嗣之名俾夫嗣不斬爲幸耳翁哀其竟許之

蔡氏綏遠將軍毓榮女也賦性端貞適候補主事金墩
生年十八夫亡遺一子一女子旋殤氏矢節彌貞繼
姪啟復爲嗣恩勤撫教任內閣撰文中書康熙四十
二年 覃恩封太孺人

韓氏蔡將軍仲子海鹽令珣妻原任貴州按察使阿琳
妹也性貞淑嫻禮訓夫亡守節家政肅然遵夫命撫
幼叔瓚教養成立

郭氏白石營遊擊李重美子若賓妻年二十九夫亡側
室潘氏年二十六氏與矢節同守撫遺孤浩遊庠考
入明史館當事多題贈表其雙節知府張朝琮旌曰

永平府志

卷六十八

列女上

八

松筠雙勁

謝氏陝西西安府司獄王國垣妻年二十二夫亡於官
氏拮据經營扶匱歸里撫三歲孤成立守節三十餘
年知府張朝琮旌之

庠生韓遇春妻閨氏遇春爲明陳太僕王庭之甥庠生
景昌子也幼孤時際鼎革母陳辛勤教育爲諸生以
攻苦病故氏時年二十八撫子生陽亦入洋婦孫氏
性極溫婉至二十七陽又亡姑媳同矢苦節姑陳氏
另有傳

王言妻高氏從夫就食錦州年二十七夫亡遺子女各

一氏竭蹶扶夫柩旋葬子娶後又歿遺孤孫甫周月氏撫之成立苦節四十餘年

高文秀妻王氏年二十七夫亡遺孤永清甫三歲氏矢志撫孤飲冰茹蘖爲子婚娶婦喬氏生孝謹頗能承姑歡後連舉四子至二十八歲而永清歿姑媳共勵貞操撫四孫皆成立

王應熙妻常氏年十八于歸二十一歲夫亡家貧無子氏堅貞自矢與夫弟應君同爨娣陳氏事嫂如姊共勤紡績陳年二十七而應君又歿乃繼嗣子同心撫育共事衰姑常卒年八十三陳卒年六十三雙節齊

永平府志

卷六十八

列女上

九

芳同治十三年 族

李占魁妻陳氏年十八于歸琴瑟靜好不數年夫歿遺一女矢志守節惟夫弟占鼇是依娣劉氏性溫婉妯娌雍睦無閒言後娣生一子而所天亦殞劉事寡嫂如母教孤兒代父與嫂氏黽勉同心李氏箕裘賴以不墜焉

何文炳妻王氏舉人椿之子婦也夫不慧不辨菽麥氏義命自安無幾微怨尤意事翁姑至孝家雖貧堂上不缺甘旨奉後生一子夫亡仰事俯畜家益窘乃寄食母家及歲暮歸必罄一歲女紅之貲潔滌澹以奉

翁姑後子習商家業漸以小康人以爲節孝之報焉
魯璽妻劉氏性純篤孝事衰姑夫病衣不解帶寢食俱
廢及夫歿誓以身殉時姑以痛子故亦病甚氏祈以
身代醫藥罔效乃割臂以進卒不起氏喪葬盡禮苦
節終身

王從聘妻張氏年二十從聘病篤與訣氏誓以相殉及
卒氏引翦自盡知府張朝琮給扁旌之

左貴妻葉氏農家女也然頗知大義夫被徐旺等羣毆
身斃氏痛夫之死於非命欲鳴之官而旺黨陳泳安
向氏穢語極污褻氏不堪其辱又憤門戶單微夫讐

永平府志

卷六十八

列女上

十

之無以復也遂自盡道光十三年 旌

蒙古正藍旗嘎爾杭阿妻那氏冷口關駐防滿洲正紅
旗那隆貴女也十八歲于歸夫羸弱善病年二十三
夫病劇謂氏曰我必不起我家貧我死汝速嫁勿爲
我父母累也氏泣慰曰何暇計此善珍攝毋以我爲
念尋病革目眈眈注氏不轉瞬氏竊計曰使吾夫目
不瞑以有我在盍先死使無身後慮計決遂潛出登
南城以衣蒙首投城下踣鄰人奔以告舁歸氣綿綿
如屬絲夫睨視一笑而瞑翁姑大哭日兒死則死耳
奈何苦吾婦若是日灌以醴粥月餘復蘇泣謂翁姑

曰兒求死不死何顏人世亦何顏地下乎且重貽翁姑憂罪滋深矣請輦我至母家善調攝儻此體不殘深恩庶或報萬一耳從之氏念夫亡身病翁姑衣食何所措乃以口分遺夫兄佐菽水奉後兩載餘始杖而起遂歸而所居破屋已傾圮營房兩間翁姑與夫兄居焉氏無棲身所乃以茆茨接後檐作團焦狀僅庇風雨而已二十餘年定省溫清無缺禮雖糠粃不給處之晏如及翁姑歿哀動鄰里君子謂節烈賢孝四德備焉誠巾幗之完人哉咸豐九年 旌

庠生潘贊清妻張氏于歸後琴耽瑟好清下帷攻苦家

永平府志

卷六十八

列女上

十一

政悉委之婦氏親操井臼閨內外井井有條旣而清以勤學致疾氏日侍湯藥衣不解帶者數月彌留之際氏焚香籲天祈以身代卒不起卽欲身殉而呱呱者方在抱乃忍死撫孤未幾而子亦殤氏大痛曰此天喪我也摒擋喪葬事畢次日卽閉戶自經時同治十一年七月十日也年三十有七十二年 詔旌入

祠

高氏邑進士龍躍女孫庠生翊廷女也翊廷僑寓京師爲女相攸得銓部吏浙江張澐因妻之琴瑟和諧撫前室子如己出又以知書明大義家政肅然光緒元

年夫故氏呼子至諭以後事遂閉戶自書甘心殉節
狀並絕命詩數章仰藥以殉恐歿後爲子累也時年
二十九歲事聞 予旌

安某妻俞氏性端重不苟言笑夫兄廷材素無賴欺弟
柔懦向氏褻語氏怒且泣曰身一婦人而爲男子羞
辱何生爲遂自盡光緒二年 詔旌

以上盧龍

明

興州衛指揮衛一清妻紀氏屢孕不育時夫已五十勸之納妾不許氏自爲納三妾各生一子夫卒子俱在襁褓氏與三妾誓同撫孤保愛如已出自二十七孀居三十餘年慈睦無閒言撫按檄表其門曰節義雙全長子如樞襲世職次如楹庠生 如桐舉人任知縣

李氏忠義衛軍餘王天祿繼室也祿先娶馬氏不育乃納妾徐氏生子堦馬氏亡祿不欲更娶徐勸曰中饋可任蘋藻非嫡誰主乎因更娶李氏懷孕七月而夭

永平府志

卷六十八

列女上

十二

祿故後生子墀李年方二十舅姑使再醮曰余妻也有死靡他徐曰吾雖妾豈適二夫哉攜手悲痛同心立志訓育二子以至成立李卒年六十三徐幾八旬子孫二十餘人撫道表其門

陳氏興州衛百戶李承恩妻婚三年生子國棟夫亡守節事舅姑生養死葬如禮爲兩叔擇配成家教子以義方比長服官有過必笞責之雖至親終身不見仇氏興州衛百戶沈鳳妻鳳守剗車嶺寨北兵陷寨氏被擄將污之不從支解死

馬氏庠生何秉善妻因冷口兵變被執上馬至青龍河

躍入水中死縣建貞烈坊

陳氏高貴妻賦性堅貞鄰有強暴欲逼而污之勢急投井死總理戚繼光立石井旁題曰全節井

楊氏拔貢生韓范繼室年二十餘適范數年夫亡氏號慟幾絕乘閒縊於柩前家人救之既葬飲鴆死

徐氏楊茂華妻崇正三年夫沒於兵氏聞之自縊鄰婦救之至次夜以柴草塞門自焚死詔旌建坊

國朝

孟氏馬巽妻也夫亡痛甚欲自經姑泣謂曰新婦有子在乃欲從之死使不幸而子不成立是再死汝夫且

永平府志

卷六十八

列女上

十四

新婦素知書明大義死易立孤難而忘諸氏乃蹶然起時年方二十二也家故貧一家生計皆仰氏十指先後持舅姑喪有加禮及娶婦生孫而子與婦相繼亡又撫幼孫以祖母代母艱苦備嘗氏幼能詩及稱未亡人遂絕不爲著有居家二十則遠近傳以爲法杜貞女其先寶坻人徙居於遷父文通早卒依寡母以居幼許字於建昌營郭莊董文柱未結褵而文柱亡時乾隆十九年正月十八日也女年方十九凶問至卽痛不欲生母苦勸慰之繼欲隨母往弔母不忍拂其意至則泣而鬚剪髮入棺遂留以事姑是年姑沒

事翁與祖姑以孝稱翁恆外出遺三叔俱幼女并曰親操門內外事竭力支撐三叔俱得漸次授室乾隆三十六年縣令靳公榮藩捐俸爲置腴田十畝以贍之至五十年乃得旌

趙氏王運昌妻也夫年五十無子家貧又不能置妾媵氏因罄己匱資私積爲夫納妾相待如姊妹恩禮周至逾年生一子保護如己出夫嗣得以不絕周易睽之彖曰二女同居其志不同行婦人之不妒亦難矣哉氏能如此吁可風矣

王孝婦鄭士亨妻歲貢生賜琛之女鄭故貧游學於外

永平府志

卷六十八

列女上

十五

者十年姑病廢遺薄田二畝氏自操作紡績以養姑凡動轉以肩背就姑負之而行後夫歸貧如故而奉事加勤姑年五十餘病亡氏亦以勞苦殘疾卒

許烈婦居邑城之大南街夫劉錕以羸疾卒婦甫二十五歲事姑孝姑甚愛憐之夫沒將百日婦潛服鹽滷猶操作姑左右如平常姑察之曰何故覓死婦曰夫死我年少無子女不死何爲所以不卽死者念嫂將媿幸得男爲夫立嗣耳今嫂乃生女而又死我不死何爲昨服滷坐牀上大汗竟不得死嗣聞人言服滷者行百步毒發卽死今我行約已步過百無救法死

決矣姑撫之哭猶強笑語姑有嫂在姑無復念我頃之遂死

李廷珍次女陳學賢妻也學賢善病事之謹四年而學賢沒氏年方二十一旣葬遂縊以殉先是夫沒時即繼夫兄稚子爲嗣及安厝畢夜檢衣物各署所與遠逮子媳無所遺其縊也以綾七尺大書其上曰從夫命復揭卒時三更字於壁有司嘉其節撰烈婦贊以旌之邑明經馬恂爲之碑銘

崔氏民家女也適岳某岳故無行凡傭保之強暴者皆與之昵而甘爲弄兒焉旣復欲其黷於崔以媚之乃導之入家崔閉居一室夜則和衣寢誘逼百方終莫能奪岳乃潛繫崔之頸招強暴入崔堅拒死之官廉其情置岳及強暴者於法而表崔於母家之楣

蔡氏史鴻繼妻也少鴻五歲鴻亡時氏年二十二前室子七歲已子三歲撫之無異視家赤貧以十指爲產姑老得泄瀉疾臥牀數月糞除惟潔翁姑相繼亡殯葬皆盡禮道光十二年大饑至以樹葉爲食爲前子完婚呼已子謂曰汝今十一歲祖父母雖故汝兄成室汝已有依矣吾積勞病作將從汝父於地下汝務自勵以慰吾心遂乘閒飲溲救以藥不卽死鬱鬱數

月而卒時年三十子鳴琴餽於庠

李氏夏氏鄭德莊側室也德莊知蘭谿縣時所納事嫡室孫皆惟謹二人者更相得也李先歸鄭性溫婉長幼愛敬無閒言夏沈默知書史善女紅歸鄭時年方二十半載而德莊卒於官時母李孺人尙在堂謂李曰汝生長南方父母親族皆在此若從吾北旋飲食風土皆不習不如仍歸母家後路正未艾也李泣曰妾雖賤然事主君數年矣若此身後何以見主君雖死亦侍太孺人歸而夏號咷謂李曰主君旣死汝事生者我事死者卽欲仰藥死孺人復諭之曰汝殉夫

永平府志

卷六十八

列女上

十七

誠善但吾年老豈堪疊經哀慘吾生平雖不足道然自二十五歲爲未亡人今七十餘幸孫曾滿前汝卽以吾爲法可李亦在傍勸慰之乃泣諾及歸嫡患痰疾展轉牀蓐者八載李扶掖抑搔服勞不倦夏則日勤婦工夜挑燈陳說古今故事爲太孺人及嫡排悶謹守閨訓終身無聞其笑語者鄉黨兩欽之李浙江杭州人卒年七十夏金華人卒年五十五李有二女俱適望族

李氏張德鄰妻也生三女而德鄰亡矢志不嫁道光十二年歲大饑人相食鄉故產石灰乃驅驢販鬻日奔

走墟市閒歸必市甘旨以奉姑已乃與女同食麤糲
一日薄暮遇土賊數人欲行劫氏泣告曰人苦莫我
若如欲劫我乞將我驢去留我囊中物使我姑不致
餓死卽恩我也賊心動相顧歎息舍之去氏自二十
八歲守節至八十一歲卒

楊氏年十九歸龐祝爲妻時祝已邁疾月餘矣合昏後
卽親侍湯藥衣不解帶祝沒痛不欲生翁姑勸之始
強飲食平居執子婦禮甚恭撫繼子如已出獨居靜
室每食必設雙箸凡二十餘年年四十七卒

三里莊李雨田妻殷氏十九歲而嫁雨田卽外出歲僅

永平府志

卷六十八

列女上

十八

一歸翁鰥居腹疾久而不愈氏奉饘醢侍湯藥中裊
廁踰必親手洗滌數年不倦及卒殯葬皆如禮至二
十四歲雨田沒於外氏欲以身殉僵臥不食或勸曰
汝事尙未了何可死乃起旣葬集親族於室曰吾青
年無依所以不卽死者爲吾夫嗣未立耳自今後敢
有奪吾志者以左手著榻伸食指曰有如此指右手
引廚刀驕然斷之刀入木者幾寸眾皆駭歎而散時
同治十一年正月也

鄧氏馬孝廉則璘妻刑部員外郎克興女也年十九適
璘時翁恬爲甯遠學正氏侍翁姑於任以色養稱璘

亡氏年甫二十八子旭方三歲姑已前卒凡姑素所嗜食者悉書於籤晨夕必叩禱乞籤而後上食如儀蓋暗合古人事死如生之旨迨同治元年翁沒於任攜幼子扶三櫬以歸歸後一月卒年三十八

張氏西寨人東塞劉大妻也性聰敏讀書識字習算法大幼而不慧其父欲擇聰明女爲之室以爲之助相攸得氏年十七于歸逾年而大亡遺腹生子鍾才課讀謀生一身兼任凡米鹽瑣屑皆心籌而手記之家賴以康鍾才三十九歲亡又撫孤孫課讀如課子時至六十九歲卒苦節之貞已五十載矣

永平府志

卷六十八

列女上

十九

貞女朱氏農家產也性聰慧寡言語父桂薰珍愛之欲爲選佳壻故及笄猶未字也適母病二年不愈調羹嘗藥日夜不離則母病劇輒泣曰母生吾不離母母倘不諱吾當相從地下耳及母卒送葬歸遂仰藥死時左同治四年五月晦日年二十一人咸曰朱氏有女矣廣文翟叔琴爲集毛詩六章以悼之詩云窈窕淑女逝者其亡有孝有德休有烈光^一憂心惻惻無母何恃欲報之德及爾同死^二靡日不思涕泣如雨舍命不渝其毒太苦^三入此室處維塵冥冥宛其死矣以赫厥靈^四陟降庭止烈假不瑕來格來饗籩豆

靜嘉

五

人之云亡孝思維則爲章於天聞於四國

六

榮姑遷安冷口外石嶺周氏女沙果溝張誥之聘妻也
未婚而張以疫死女聞之卽絕口不食父母詢之不
哭亦不言形如木偶奄奄七日沒時道光二十年正
月也

張助妻李氏十五歲歸助助時年十三其翁某素兇淫
數調之不從翁積怒假他故致之死投尸井中母家
以受賄息訟翁踰年雷震死

烈婦某直隸遷安縣人夫賈也恆外宿翁耄矣姑及庶
姑私於傭翁不知也傭謂其兩姑曰主耄不及知今

永平府志

卷六十八

列女上

二十一

惟慮新婦知爾許我並及新婦婦不言誰知之者吾
與爾安枕矣兩姑同聲應曰唯然惟子命翌日婦甫
妝傭闖然入其戶婦驚叱之曰嗒若何爲者明日又
遇之杵臼閒婦色益厲傭終不能近傭與兩姑竊計
曰爾婦峻恐終不得爲吾有吾傭也勢不可以強犯
則吾與爾事終敗爾能使主翁近婦婦順翁則吾與
爾有辭矣婦不順翁翁必怒翁怒而讒婦於翁翁必
益怒如是則婦言無足取信矣兩姑又同聲曰唯然
事固可以緩圖也翁耄矣然猶好內兩姑由是日繩
新婦之美於翁久之翁心動婦素婉順不虞翁之有

他志也一日婦侍翁語翁按其腕婦恐疾聲呼姑姑至翁避去婦泣姑慰之姑去翁從旁舍出遽抱持婦婦大詬兩姑皆至婦請歸母家兩姑僉曰翁實無狀然若以明日歸耳兩姑皆就傭謀曰翁事敗矣婦且歸傭遽曰歸則事洩耳兩姑曰然則當爲奈何傭曰且爲奈何良久曰嘻爾盍令翁殺婦兩姑同聲曰吾何能令翁殺婦傭俛首笑曰有如是也而以言怒翁又僞爲忠於翁者設利害緩急以懼翁殺婦決矣翁殺婦則歸惡於婦翁可不償幸而以翁償婦吾與而安枕矣且殺之固在今夕兩姑又同聲曰唯然惟子

命由是兩姑皆危辭以悚翁翁耄而憤是夜翁及姑及庶姑入婦室悉褫上下衣絮塞口杙椽陰烈婦卒明日婦之父母昆弟至以暴疾聞也無所得傷狀殮矣鄉鄰有稍聞其事者竊竊語猝遇翁色變婦之父母昆弟執翁詣官久不具獄直隸總督那彥成公偵知之以好語啗翁及兩姑情露乃剖婦棺驗得實並知首謀者傭也悉置之法

案此文乃元和朱綬所撰

之錢唐吳君祈祈之戚汪某官遷安令決是獄者婦於嘉慶二十五年旌今查嘉慶未縣令有汪姓本名者而婦之姓氏查刑禮二科俱無卷宗冊檔可稽問之鄉士大夫亦不記憶姑載於此以俟後之知者焉

補焉

毛氏明光祿卿徐雲達側室也生子元修甫八歲夫亡氏矢志撫孤勤儉持家苦節四十餘年順治中邑令王永命旌曰大節維風

石灰婦蛇探峪之近村人逸夫姓氏故以其業稱夫素以販石灰爲業夫歿遺一女翁老且病婦念家無恆產不勤操作而翁何以養趾如衣夫衣襲夫業爲餬口計婦故黑脰壯健如男子乃策蹇赴市與男子伍人亦莫敢侮久之婦勤於業所獲頗贏翁得其養勝有子時翁八十餘終女亦適人氏語人曰吾事已畢此後可稍逸矣言之貌甚戚其孝根天性如此此與前張

永平府志

卷六十八

列女上

二十一

德鄰妻李氏事頗相似而所記微異茲節馬瑟臣石灰婦傳附錄之以備參攷

張玉璽妻王氏十六歲歸張爲繼配夫好遊俠氏屢勸不悛夫異母弟四人而夫獨出於前母父母以其不務農業遂惡之氏奉舅姑維謹嫁七年生二女夫因不得於親遂出關不返氏心雖愁苦而面無戚容晝夜操作事舅姑有加禮由是漸致底豫後遣二女嫁匳裝皆出十指力而夫之音問終杳有傳其夫死勸之改適者氏峻拒之其至孝堅貞與苦節無異宗族賢之

張若工妻劉氏性賢淑識大體孝事翁姑嘉慶七年家

遭回祿氏先奉三代木主出餘物付之焚如勢處倉猝而仁孝發於至性非士大夫所能緣飾者年八十九無疾而終

劉天成妻徐氏夫賈於遼積年不返氏以女紅養其姑姑歿殯葬盡禮氏於同治五年歿苦節五十餘年孤身無嗣族子仲和養其老而瘞葬之

張桂妻曹氏十七歲于歸家徒壁立夫業銀工於外恆數年不歸氏上事翁姑下撫夫弟必敬必慎克儉克勤夫不寄養贍貲亦無怨懟一家得享溫飽皆氏之力鄉里賢之

永平府志

卷六十八

列女上

二十三

高成妻李氏年二十八夫亡遺孤發方兩歲氏撫之成立爲娶婦陳氏發適以其年卒遺腹生子陳撫孤苦守厯五十六年縣令以兩世同節額學憲以孝慈完節額旌其門

陳遇泰妻韋氏年二十七夫亡子鼎方周歲矢志守節事翁姑克孝爲子娶婦鄧生孫寶蔭甫四歲而鼎亡由是一門三世仰事俯畜皆資十指夙夜劬勞而勤苦不輟焉

楊允執妻孟氏庠生忍堂女也幼嫻姆訓孝事翁姑年二十三夫亡撫孤瑞清成立有同母弟二皆早逝氏

每歸甯必諭兩弟婦以節孝大義因皆矢志苦守一門三節人咸謂氏能錫類焉

劉繹如妻鄧氏十七歲于歸端靜寡言孝事翁姑年二十三夫病歿氏矢志撫孤翁姑前未常有戚色後爲子娶婦而子旋夭節哀理事上慰雙親下撫孀媳貌不悴而神傷矣嗣孫尙幼同媳殷勤撫育媳亦克承姑志雙節齊芳

渠萬有妻曹氏夫亡無子矢志靡他繼夫弟之子湧泉爲嗣娶婦後泉又亡遺二孫一在襁褓氏率婦紡織晝夜不倦撫二孫皆成立姑媳共勵貞操四十餘年

永平府志

卷六十八

列女上

二十四

烏昌元妻劉氏夫亡生遺腹子映奎恩勤撫育娶婦周氏幼讀書深明孝義年三十映奎又歿無子息亦無近族可依周以女工傭於人所得之資悉以甘旨奉色養二十餘年無少懈姑歿哀禮兼盡一門雙節而周之苦節尤爲鄉里所共憫焉

于福德妻張氏夫亡遺孤豐甫三歲家赤貧氏矢冰霜日勤紡績後爲子婚娶生孫朝璽方四歲豐又亡氏與婦共勵苦節教孫耕讀守節四十四年

吳龍翼妻尙氏年十九夫亡甘貧勵節孝事翁姑後姑歿過哀嘔血數斗而卒年三十有五光緒二年旌

孫貞女遵化州人縣民丁良說之聘妻也年十二養於夫家閱三年夫故時尚未婚矢志守貞終身無玷羅烈婦殷榮妻榮素無行將鬻之兼及子女婦度無力拒之夜攜子女潛出投水死時年三十四

馬開祥妻楊氏開祥有疾謂曰吾死汝須善撫孤氏泣曰撫孤事小殉節事大未幾夫故氏乘閒自縊

白烈婦尹氏白鎔妻鎔優伶恆數月不歸母高氏寡而淫通於回民溫姓者有年矣女十五尙未嫁高恐尹之異已而事不能久也謂尹曰汝能從我則飲食衣服惟汝所欲否則欲啖飯不得矣尹故溫婉不從亦

永平府志

卷六十八

列女上

二十五

不敢厲言拒之絕粒兩月日飲泔汁升許而志不渝高怒命女覓鐵鎔二火之使紅縛尹於牀母女更番以鐵鎔烙其陰少腹皆焦號聲急而高愈怒以鐵鎔擊首髮皆然遂一目裂出而死時年二十一母家以貧故覓食於外不知其事至今藁葬焉

豈守先妻馬氏夫目瞽且善病氏自安義命毫無怨尤年二十四夫亡遺一女辛勤撫育紡績自給矢志完貞不三年而女又殤遂服瀕死時年二十四歲

王連發妻謝氏孝翁姑睦妯娌鄰里皆稱其賢淑同治元年夫染疫暴卒翁以家貧子少翌日即使歸窆殯

後氏恐翁姑過慟曲慰百端勸之寢乃退而自縊迨家人驚覺救已不及亟啓匱覓衣裘而附身附棺之物已悉備遂取以斂

賈登第繼妻徐氏年二十一歸第次年夫病歿氏痛不欲生卽欲殉節轉念遺有前室女夫素所鍾愛者身死此女將焉託乃忍死撫育之飲食教誨過於所生及女將嫁治裝則委曲周詳無少忽迨女歸省氏曰吾甚喜聞汝能執婦道不負教養苦心今而後庶可見汝父矣女雖詫異初不疑其有永訣意泊歲暮女將歸復懇留數日晝夜諄諄教以婦道旁觀皆竊笑

永平府志

卷六十八

列女上

二十六

其迂女旣至夫家整理包裹見有母平時所用剪刀姑置之終未悟其有永訣意不數日竟仰藥卒時光緒元年除夕前日事也年三十有五嗚呼撫孤事畢從容盡節其女中之程嬰乎

高松齡妻鄧氏夫病篤醫藥罔效氏潛割臂肉和藥以進厥後刃傷毒發人始知之未幾夫卒氏誓欲相殉家人防之嚴越六年鬱鬱卒

馬廷林妻張氏道光十三年四月夫故六日從容謂夫弟廷諤曰汝兄殯期何日答曰排九蓋土風九日葬謂之排九屆期氏潛更孝服自縊以殉遂與夫同日

葬光緒二年 旌

全林妻徐氏夫病篤時謂婦曰家貧無子我死汝守乎
嫁乎氏曰君無過慮但安心養病可耳脫有不諱三
年內黃泉相見也夫歿未期年果哀毀而死
以上遷安

明

金鼎妻李氏年二十八夫亡無子貞節自勵與翁妾張
劉同守苦節衣食屢乏節操愈堅詔旌一門三節
王氏庠生王堯相妻年二十一夫亡晝夜號泣勺水不
入口姑以姑老子幼諭之乃毀容截髮勉事鞠育三
十九年如一日萬曆戊子子調元領鄉薦直督題旌
金禧妻高氏年二十五夫亡子鏞方兩歲矢志撫孤舅
姑以其少也欲奪其志慕其姿者爭求之氏思毀容
乃免夜閉戶窗以艾灼面及覺毀窗入救則瘡血淋
漓斑著面幾滿見者莫不歎息以子鏞官光祿寺署

永平府志

卷六十八

列女上

二十八

正封孺人年九十終

撫甯衛軍餘華壽女事母不嫁先是女五歲時壽回原
籍取軍裝不返母潘氏年二十五撫女守志誓不改
適女稍長將爲議婚女不可曰母不忍離我我何忍
離母丫角終身豈異人哉遂與母居者幾四十年母
故樞母於牀側破屋半閒衣食常缺惟閉戶誦佛而
已萬曆七年病卒年六十餘矣鄰里憐之爲助棺舉
葬焉知縣徐汝孝上其事詔旌其門爲貞孝之門

國朝

張氏俞承恩妻也家貧夫出關就食氏事孀姑能得其

歡心年二十六夫沒姑亦尋卒攜孤子負土爲墳兩
手皸瘃淚涔涔與汗俱下母家勸之改適力絕之終
身不歸甯六十三歲卒

謝英有聘妻曰陳氏幼失怙恃叔母寡居依焉英母因
其子久出不返欲與離婚氏不可後聞子病沒於外
復伸前議復不從或勸之曰禮不廟見不爲婦况未
合昏乎何自苦若是曰吾爲女子旣以身許人矣有
死無二不知其他竟歸謝擇子後其夫紡績奉姑以
老

王氏庠生劉振興妻年十九夫亡遺孤廷瑚甫月餘姑

永平府志

卷六十八

列女上

二十九

與祖姑俱寡三世僅侍一綫氏仰事俯育備嘗艱苦
姑與祖姑相繼沒殯葬如禮後教子游庠郡守張朝
琮旌之

魯氏李九齡妻年二十三夫亡遺孤週歲舅姑早世姑
憐其少命之改適誓死不從甘貧勵節炊煙常斷曾
絕食六日戚黨憐而周之卒撫孤成立

王有容妻陳氏年二十二夫亡姑患疽藥之罔效氏私
計曰聞刳股可以已疾吾豈愛此一月肉焚香跪禱
握刀割左臂血淋漓被肘以一臠烹以食姑疽旋愈
氏病臂月餘姑問之詭曰偶中寒微作痛楚耳而孫

尙勇妻劉氏夫外出謀食孀姑病貧不能謁醫亦以刀剗胸前肉兩許作餅以奉姑數日病若失一時鄉黨並稱焉邑令陳鍾琛皆旌之以額

春姐魯氏女正姐樊氏女也春姐夫劉柱兒先爲李氏螟蛉子與魯論婚未娶而柱兒歸宗李族之黠者與魯謀曰女字李也彼劉矣欲復妻李妻不可也於是魯還李聘而以春姐別字焉劉貧罔敢較春姐曰易李而劉仍吾夫也吾雖不知書然觀影戲女更二夫爲下義今乃使吾更二夫吾羞之亡之劉告以故劉愕哈間而魯之偵者至遽劫春姐去復與劉鬪而成

訟官判歸劉且使先合昏公庭然後歸官坐堂皇送之具鼓樂焉越歲而樊氏之事起初正姐字楊氏子楊子十歲而病廢楊之父母不欲以已子累人女也辭樊婚強而後可遂更字正姐於王正姐悲不自勝凡王之聘物未嘗御也嫁有日矣謂其母曰兒嫁安歸母曰歸王曰兒非受楊聘乎母曰然有之顧王病廢且辭婚吾憐兒爲兒相攸得王故別嫁兒正姐默然比夜潛出經深山密林凡數十里皆虎狼出沒處翼晨達楊所翁與夫不識也姑略識之問何爲曰爲婦翁姑痛曰汝之高誼古名媛不之過惟恨吾子薄

命病且已離婚奈何未幾其父母尋至族黨鄰里咸集楊室互勸之歸正姐厲聲曰夫病天也爲病者婦亦天也舍吾夫而別求夫是違天也吾有死耳楊樊知正姐之志堅而慮無以謝王也質諸官使告絕於王而正姐遂卒爲楊氏婦事在乾隆甲戌之冬時年十八春姐事在乾隆癸酉之秋時年十七云

烈婦姓高氏盧龍燕河營高揚之女幼字撫甯城角莊蔡錫田錫田得輓腳病足不至地者數歲同治八年氏與夫年俱二十一父母於正月擇吉爲之合昏錫田戲謂氏曰吾與汝爲夫婦固願結百年好然我病

永平府志

卷六十八

列女上

三十一

不久活恐終累汝再醮耳氏正色曰妾雖農家女亦知大義君如不諱當地下相從保無他也至三月錫田病劇氏每夜焚香跪哭請代兩目俱赤及五月初氏料夫必不起遂絕粒數日不死家人苦勸慰之乃乘閒服毒死錫田喜曰果能不負所言吾死瞑目矣一笑而沒旣斂俗於次日晚赴廟招魂有二蝶相隨而飛及柩乃不見人以爲異比之韓憑夫婦焉

傅氏江南壽春營副總兵尙謙女也適國學生羅國珍姑宋氏自二十九歲守節氏孝事維謹年二十五國珍亡遺兩孤俱幼氏與姑相依爲命矢志撫孤日勤

機杼教子爲諸生知府張朝琮旌曰一門雙節

郝明颺妻趙氏善事舅姑夫亡後孝敬彌篤姑憫其勞
慰之曰胡不少憩恐以勞致疾答曰勤動乃婦職且
以儆兒女輩耳撫孤善繼成立娶婦馮氏善繼旋歿
氏與婦馮共勵貞操俱以節孝著雍正五年 旌

監生李逢元妻馮氏年二十七夫亡無子繼夫從子端
爲嗣至十六歲娶婦劉氏而端又歿氏與孀媳共矢
堅貞撫族孫美成立守節四十五年卒

施氏揚州甘泉人界嶺口把總李陞妻也隨夫任所同
治七年夫病故遺二歲女宦囊空如未能扶匱回籍

永平府志

卷六十八

列女上

三十一

遂流寓界嶺扶幼女爲夫守墓鍼黹自給恆曰不舉
火有勸之改適者以死自誓歷任弁兵咸服其貞烈
憫其孤苦恆周恤之

王士鈞繼妻武氏年二十七夫亡家貧子幼氏茹苦如
飴撫子入武庠娶婦生孫而子旋歿氏與寡媳幼孫
曰僅一餐終無怨尤之意年七十九卒

黃國香妻郝氏七里澗人二十八歲守節賦性溫和素
嫻閨訓夫以服賈病卒他方翁姑憂病奉養惟謹子
甫娶而又天與孀媳共矢柏舟苦節貞心殆難其匹
庠生溫志和妻王氏本城西關人年二十九而孀溫故

家城之北街去母家不數武夫亡後痛不欲生或諷之歸甯稍可解憂氏正色曰憂非外來豈外人能解乎况婦人出入耳目所屬猜嫌不可不避也誓不歸甯族黨咸服其識姑楊氏晚年喪明凡飲食起居扶持皆曲體親心子三人長子天婦貞操亦如其姑毀容守節已踰十年矣

高瑞徵妻王氏年十四待年於夫家姑性悍日事苛責氏執婦道惟謹姑病刲股和藥因是獲瘳姑乃感泣爲之成禮益受憐焉雍正八年邑宰裘君弢獎以賢孝可風額事聞 旌曰至誠格天

永平府志

卷六十八

列女上

三十三

趙奎妻傅氏年二十六恪盡婦道乾隆十一年四月姑病刲股和藥以進病頓瘥邑宰錢鋆獎曰誠心孝姑孫尙勇妻劉氏夫外出謀食氏侍孀姑能養能敬姑患病調治不效氏焚香默禱割胸肉一片作餅餡以奉不數日病果愈鄉鄰公舉孝行邑宰陳鍾琛給扁旌之

溫永成妻胡氏年二十夫出關服賈子方三齡堂有孀姑永成久無耗值年荒糠粃弗給氏攜子乞食以養姑疾思肉不可得乃割臂爲羹以進之姑病良已鄉里微聞之而氏終不自言後年七十餘盛夏解衣鄰

嫗見癍痕始實告曰此一時情急不足爲外人道也
梁氏秦莊頭梁如柏女如柏先娶張氏無出客吉林又
娶孫氏生二女長卽氏也年九歲母孫故哀毀如成
人依父膝下祖俊教之讀書通章句以祖父俱業醫
兼讀方書識藥性十七歲祖俊歿氏感陳情表苦衷
繡佛長齋以報祖德時妹殤獨與父居鍼黹自課二
十四歲適李祥咸豐七年閒嫡母張氏卒于家弗克
奔喪爲位持服明年父病故權祔於孫母墓痛鮮兄
弟不得已也又六年而祥故氏時五十矣愴然曰狐
死首邱吾父母返葬撫甯九京無憾吾雖非男子其
何敢不力乃輦二棺跋涉千八百里經營畢事復慮
鬼餒無歸也立堂叔如雲之子梁順兼祧奉父母祀
爲之娶妻置產並置祭田數畝俾族人咸蒙義舉此
烈丈夫事不意於巾幗中見之見年六十三歲
史相遷妻王氏年二十九夫亡氏苦節自貞事翁姑純
孝姑病質之明神願淡食百日疾果愈旣而翁又病
復願茹素終身而翁病轉劇乃自責曰茹素本分耳
何足格神明於是每夜爇瓣香吞聲飲泣跪禱神祇
至香燼始起趨侍牀前目不交睫者二十餘日疾仍
無起色氏沈思無計忽憶古人有割肉療親者乃於

夜晚跪向北斗從左亂下剗肉三臠調羹以進仍罔效復於右乳下剗如前和藥以進時翁已綿惙不能下嚥矣翁歿後氏身負六創血涔涔漬裏衣然絕無痛楚色猶復銜哀理喪其弟韓瞥見之驚問故氏不能隱告之諄屬曰此兒女分內事慎勿爲外人道也韓爲之徧播揚人始知之厥後親族向氏詢顛末咸欲代請 旌表氏堅不承具力辭曰親病未愈徒受虛名適增慚愧何旌爲吁如氏者洵可謂節孝雙全者矣

貞女溫氏庠生溫潤女徐翹聘妻也幼失怙恃育於兄

永平府志

卷六十八

列女上

三十五

嫂年十五未婚而翹亡奔喪守節赤貧如洗代養舅

姑嘉慶六年 旌

王晏妻張氏夫亡遺孤振祖甫週歲矢節撫孤娶婦祖氏生子甫週歲而振祖又亡氏與子婦勵節苦守撫

孤成立

國學生王煌妻張氏煌隨父之任莊浪病故氏年二十二聞計號哭幾不欲生姑勸之曰有我在何遂死耶且汝夫尙無嗣忍以一死了事乎乃繼夫從子基豐爲嗣竭力盡孝教子遊庠食餼

庠生王紹先妻陸氏年二十一夫亡無子遺女方六月

矢志殉節姑諭以撫養後女復天自縊死康熙二十
年旌

張允天妻單氏幼失怙恃鞠於兄嫂于歸後家赤貧無
隔宿糧氏孝事舅姑勤於女紅夫經商病歸死之先
氏治斂具已乃於夜分焚香祝天誓以身代引刀刺
脅未遽絕母族有無賴者欲構訟氏力排之曰吾襁
褓喪親今又早失所天胡以生爲且吾嫁十年家室
融融不聞勃谿鄉鄰所悉若輩借端滋事使吾死後
得悍名九泉有知當必殛之羣謀乃寢越日與夫俱
亡時年二十有七

永平府志

卷六十八

列女上

三十六

以上撫甯